

ՀԻՄՆԱՎՈՐ ՄԵՂԱԴՐԱՆՔ

«Սուրհանդակի» № 226-ում Եղիշե ա<վագ> ք<ահանա> Գեղամյանը իր «Անհիմն մեղադրանք» նկատողության մեջ, խոսելով իմ հոդվածի մասին պ. Չալխուշյանի առաջարկի դեմ, գտնում է, որ անհիմն եմ մեղադրել Հովհ. Կարբեցի կաթողիկոսին, գրելով թե նա կամեցել է Ներսիսյան դպրոցը սեմինարիայի վերածել՝ նրանում ընդունելով միմիայն հոգևորականացուներ:

Հենց նույն հոդվածում էլ հ<այր> Գեղամյանը ասում է, որ Ներսես Աշտարակեցին էլ է դրել նույն մեղադրանքը Կարբեցու վրա, Ա. Երիցյանն էլ: Տեր հայրն ասում է, թե ընդհակառակը, Կարբեցին հակառակ է եղել այդ ծրագրին, որ բարոն Ռոզենն է կազմել, թեև դրա համար ոչ մի վկայություն, ոչ մի դոկումենտ չի հիշատակում: Մինչդեռ այդ դոկումենտները կան: Ուրիշ անգամ գուցե առիթ լինի ավելի ընդարձակ խոսելու, առայժմ այդ պատմական փաստաթղթերից մի երկու կտոր հանեմ, որ ցույց կտան թե իմ մեղադրանքն անհիմն չի և բարոն Ռոզենն էլ այս խնդրում հակառակ չի եղել Կարբեցուն: Ահա հատվածները այն գրությունից, որ 1836 թվականի հոկտ. 27-ին № 524, դրկում է երկրի կառավարչապետ բարոն Ռոզենը ներքին գործերի մինիստր Բլուգովին. «Что касается до существующаго в Тифлисе армянского училища, то **я вполне разделяю мнение патриарха Иоаннеса¹**, чтобы его обратить в здешнюю армянск. Семинарию и т. д. և շարունակության մեջ ասում է, թե դպրոցի համար կտակած ու նվիրած փողերն էլ կգնան «преимущественно для обучения бедных армян из священнического и других сословий, **поступающих в духовное звание**» и. т. д. (Акты собр. Кавк, археогр. комис., т. VIII, стр. 302—3).

Ինչպես տեսնում եք, Հովհ. Կարբեցի կաթողիկոսը առաջարկել է և բարոն Ռոզենն էլ նրա հետ միանգամայն համաձայն է եղել: Իսկ թե ինչպես վերևը, Պետերբուրգում լիովին չի անցել այս առաջարկը, դա երկար պատմություն է: Ես միայն կամեցա ցույց

¹ Ընդգծումները մերն են: Ն. Թ.:

տալ, որ անհիմն չեն եղել իր ժամանակին Ներսես Աշտարակեցու և Ա. Երիցյանի մեղադրանքը:

Բայց ենթադրենք, թե Հովհաննես Կարբեցին այդպիսի առաջարկ չի արել:

Ավելի լավ: Ուրեմն, դուրս կգա, որ նույնիսկ Հովհ. Կարբեցին էլ չի ասել այն, ինչ որ ասում է պ. Գր. Չալխուշյանը: Եվ տեր հայրը, որ աշխատում է Հովհ. Կարբեցուն ազատել այդ մեղադրանքից, թե նա այդպիսի առաջարկ չի արել, անպատճառ պետք է մեղադրեր պ. Չալխուշյանին, որ այդպիսի առաջարկ է արել: Բայց, չգիտեմ ինչու, այդ մասին լռում է ու պ. Լեոյի օձիքն է բռնում, որ այստեղ ոչ մի հանցանք ու մասնակցություն չունի, ասում է՝ նա մթնեցրել ու շփոթել է պատմությունը, մինչդեռ հենց ինքը, հ<այր> Գեղամյանը իր «Պատմական քաղվածքները» գրելիս օգտվել է և պ. Լեոյի պատմական գրվածքներից ու անունն էլ դրել աղբյուրների ցանկում: